

四庫全書

集部

欽定四庫全書

集部

御定歷代賦彙卷六十八

詳校官檢討臣劉圻

主事銜臣徐以坤覆勘

總校官編修臣王燕緒

校對官中書臣李斯咏

謄錄監生臣周元濬

欽定四庫全書

御定歷代賦彙卷六十八

性道

融結為河嶽賦

唐
黃滔

象帝以伐出物我陶開杳冥至精風散元氣雨零一濁
一清既定乾坤之體或融或結遂為河嶽之形豈非斷
乎鼇足之時剖彼雞黃之日二儀各立以交泰一氣旁
流而洋溢於是蒼茫不定奔為歸國之墟積聚無從疊

作干霄之質則令川陸天下江山域中淺深莫極夷險
難窮剛柔隨之而洶湧嗜欲繼之而隆崇翻雪浪與霜
濤下吞方厚拔重峰兼疊嶂上列圓空爾乃產鱗介蟲
沙殖毛羽草木星辰晝夜以明滅烏兔東西而往復則
有龜負龍擎文籍其陽九陰六共觸愚移傾缺其天樞
地軸如疏樸畧波萬壑以派分似截渟泓仞千巖而雲
矗旋聞大禹鞭神巨靈湧身鑿通浩渺擘斷嶙峋然後
總注滄海爭摩碧旻舟楫風生航利名於世世輪轅雷

起駕禍福於人人至今若帶興言如拳設喻牢籠下土
以箭急控壓中洲而石固三門九曲競呈升沒之源太
華維嵩交闢奔衝之路誰能究厥理考其情溝瀆曷為
而散作丘陵奚補而攢成致彼至柔灑回邪而互急俾
其峻極干道德以全平吾欲炭韜陰陽鑪然天地鼓將
灑迤之濬谷寫破連延之積翠令今日之形象復當時
之寤寐默默繇繇然却歸於無事

義路賦

以言有君子得
行斯路為韻

唐王 榮

義則本在路猶強名雖無有而為有亦時行而則行人
或未知謂投足以山險心如能制信在躬而砥平既絕
回邪無差正直居則思之而可見忽爾覓之而安得默
識終始潛名南北昧其所在迷吾道之康莊能此是敦
造先王之閭闔然而視之者不為好徑赴之者豈曰多
岐邁德而謂其達矣立身而何莫由斯聖人每修孰慮
乎崩榛所塞君子常喻寧求其老馬能知稽夫近遠甚
夷往來無苟周朝之柱史奚棄鄘國之貞妻自守旁生

行葉於列樹以寧殊中引德車在摧輪而何有莫不亘
深仁宅遥通禮園匪豺狼之所到惟干櫓以斯存若乃
循其軌遊其藩有如入顏巷之中恬然自樂復似經桃
蹊之上寂爾無言可以導彼深誠臻乎奧旨相逢盡重
氣之士相護皆舍生之子徘徊其側多感分以遺身馳
驚於中必先人而後已厥大斯著其高或聞異邪途之
徑捷與左道以岐分五霸三王既適此以圖業忠臣烈
士亦從茲而報君夫如是則踳跋所為坦夷斯喻於以

闢百家之蔽塞於以洞五帝之旨趣悲夫衝蒙行險之徒曷不遵乎此路

天爵賦

元陶安

赫上帝之有命賦良貴於心官全衆美而光榮超萬物而尊安蓋是爵得於天之所賦何假分茅而胙土班瑞而錫鞶也維人有心主宰一身克具天理故曰天君當其大化渾淪冲氣絪縕質凝胚暉靈秀為人帝令誕敷付以性真上帝若曰咨爾心官聰聽誥戒天地生物元

德至大全體為仁妙用為愛昇汝斯爵惻隱爰在服此
寵嘉力行無怠制事之宜其理為義應酬裁度發彊剛
毅昇汝斯爵羞惡所繫申服嚴訓擴克必至維爾心官
朕所簡閱尚其毋貳臨汝昭晰行之以禮粲然有節文
之詳明之以智截然有是非之別既降衷而不遺當秉
彝而對越然而與是德者天之道實其德者人之功盡
已而忠則仁義實蘊於其中循物而信則仁義實用於
無窮樂夫善而不倦曾無間於始終茲皆天爵可慕可

從咨爾心官以思為職代天作工為民立極敬受爾爵
其永無斁於是尊居靈臺光闡泰宇端莊整肅臨蒞而
處以方寸為所封之土以誠信為所佩之組耳目之司
有其統筋骸之束有其主維屏維翰嚴禦欲之雄藩如
圭如璧瑩真純之奧府遂乃極高明而為堂蹈中正而
為塗觀艮象以行庭御巽風以乘車施廣譽而代繡積
太和而成廚醉以道德之醇飫以義理之腴袞衣赤紱
未足為重高牙大纛何足為殊凡君臣父子之有倫隆

殺等級之異宜揭綱常於萬世示法則於羣黎於以為
邦家之光於以立太平之基則又皆出於斯也嗚呼時
降風移人爵是炫趙孟斯貴趙孟能賤枉已求合浮雲
歆羨昧天爵之當修宜鄒孟氏感於世變也系曰皇天
無私兮賦德在躬彝倫咸備兮委任寔隆匪軒冕而自
榮兮不品秩而能崇紛吾既有此內美兮守而不能舍
也誓忠貞以自許兮庶幾因時而待賈也

孝者善繼人之志賦

以人子行孝能
繼先志為韻

宋 文彥博

稽禮經之垂訓見孝子之奉親俾繼襲於先志蓋博諭於後人必學為箕既顯奉親之要無改於父克彰務本之因得不載考斯文深窮秘旨非徒樹彼教本蓋以勗於人子欲令不悖於親固在必從於始克繼丕緒始則揚武王之休追祀先公次則顯周旦之美徒觀其孝道斯盛國家遂行悉務無違之教或敦不匱之誠其父析薪孰云負之靡克若考作室但見構之方成斯蓋君令臣從上行下效俾百姓以從化則一國而興孝用勞用

力率從安義之文學禮學詩敢悖過庭之教罔墜先德
彌增懿稱於顛沛而克肖寔前後以相承子路之貧屨
傷斯為直養孟莊之臣不改是謂難能所謂乎君子能
勞後代有繼遵地義以寧失守天經而罔替克紹前烈
我則益務於矜莊無廢舊勳我則彌遠於遜悌是曰有
後無聞辱先非惟世濟其美抑亦代不乏賢史談著書
遷繼而立言垂世夏鯨治水禹紹而隨山濬川懿哉念
凱風之言遵白華之義蓋將無忝爾祖是用不違其志

夫然則上自君而下達民固宜守茲而勿墜

中者天下之大本賦

以天下之教由
此而出為韻

宋

文彥博

中者存乎性性者命於天為萬物所宗之本乃七情未
發之前澹乎自持政教自茲而出矣感而後動吉凶由
是以生焉原夫蹟禮曲之淵微得中和之用舍聖人極
之以育物君子循之而化下人生而靜故能用其中焉
教所由興是以謂之本也始其惟寂惟冥何慮何思道
所從而隆矣人可得而由之喜怒不形守為樸素之本

嗜欲將至散成禮樂之基外物未牽中局是數苟能發
以中節是致廣而成教始惟所稟金則義而木則仁終
乃有遷父為慈而子為孝是知言其中者哀樂之未發
謂乎本者教化之必由蘊之則五常盡在散之則百禮
交修何異夫大樸將分上者道而下者器洪鈞欲播達
乎萌而出乎勾得不載考斯言詳觀至理雖化育之甚
大亦權輿而自此誠明內著兩儀蟠極之宗和順外融
萬物經綸之始有如此者不其偉而為最靈而可美著

達道以攸宜若然則天下之精無能及此縱域中之大
何莫由斯故知道不自於天生禮非從於地出起於人
性之靜肇彼民心之質所以王者之致中和雖百慮而
同歸於一

至誠盡人物之性賦

以惟至誠盡人
物之性為韻

宋 陳 襄

性理雖奧聖神可知繫此誠明之德盡夫人物之為稟
上智於中和冥通化育燭羣生於動植深極謀惟凡厥
民生應夫天粹有性之德曰仁與義罔之生也則失誠

而明之則備故窮本以知本推類而知類上以觀三極之道可得而明下以究萬物之情亦莫不至所謂與性俱生配天而誠不思而理得無為而化成深則盡人之道微而極物之精湛一德以清明坐無遺照格二儀之覆載居得輿情蓋夫人性均義也在推其所不為人性均仁也在行其所不忍將悠久以無息茲昭著於未朕窮吾理則人理斯得推吾情則人情可準心渝金石則毫釐千里而差孚格豚魚則天地一言而盡且夫蠢焉

非齊者庶物危而難保者蒸人何治之能格何施而能臻必在先誠其性內本諸身其深也有以通天下之志其幾也有以盡天下之神凡在化育孰不尊親大不失夫婦之愚必蒙其澤小不遺草木之細亦被其仁若然則情靡有遷道無所屈大人之事斯備赤子之心無拂伊尹之聖且思拯於匹夫虞舜之仁亦推明於庶物斯乃性格天道德為人師有氣帥以為之用有心官而為之思宜爾小者大者樂之利之神藏在中通變而民罔

倦智周於下曲成之類無遺故孟軻明四端之由荀子辨五官之正知之者善成之者聖稽諸高厚而不悖質之幽明而孰病況於人乎況事倫乎莫不盡其性

德至者色澤洽賦

以德輝發形顏色斯洽為韻

宋

劉 弇

德既能至形斯有歸故茲色澤之洽率由克實之輝根百善之大全初忘物我暢四支之積美罔汨脂韋竊原樂莫大於誠人之生也直厥有備善是為至德苟本諸中局者未始虧贅則見之外貌者何煩藻飾立其大者

性命默爾以皆安人焉度哉色澤油然而可識外秉四
重中清五綦其中周旋而盛亦已至其蓄剛健而新從
可知純德發若粹和在斯朝廷之上閭閻而侃侃閨門
之內愉愉而怡怡志意致修居有潤身之積英華發外
形為晬面之滋接物非特既其文成已為能用其極如
霧豹焉澤彩於幽渺如山玉焉揚輝於伏匿杜人偽之
象恭天真之踵息默然而喻始符通理之黃中即之也
溫卒異鮮仁之令色誠以矜藩祭而歸者驕態可賤取

夏畦之病者諂容孔艱又孰若藻德小言容之足美身
卑口耳之間窮而衡泌則神王而氣逸達而朱金則心
舒而體閑陋骯髒之元叔體柔嘉於仲山觀我朶頤微
義易舍龜之躁赫如渥赭得衛詩錫爵之顏有動之而
斯遠暴慢之明無就之而不見可畏之忽趨行奚事於
舜禹肝膽靡憂於楚越何假地文之示自得天光之發
所以養氣而無是餒嘉孟氏之醇醇樂內而何其臞偉
顏生之勃勃向若蒿目自累火馳弗寧窘勞倦不枯之

貌園睢盱承豫之形槁項黃馘者既中已無主曼膚駢
肩者又愚而不靈遂使赧赧而非所知徒慙表暴詡詡
而相取下舉昧沉冥夫豈知彪外之君子不誣踐形之
聖人可法蓋泚頰而達面目者未免愧積則養指而失
肩背者良由智乏故曰德至同於初澤色何從而不洽

庖言日出賦

宋王禹偁

庖之為物也空則仰滿則傾伊斯言之無係假殿器而
強名日出彌新尚安知其適莫天倪自得亦何繫於虛

盈豈不以卮無所識每逐物而歆側言無所執但因時
而語默諒何思而何慮固靡失而靡得用能滿天下以
無過體寰中而可則徒觀夫卮觥觥以弗定言支離而
不窮孰見兆朕難明始終冥其心若虛舟之泛水應乎
物類天籟之鳴空是以至道無形至人絕想詎難追於
駟馬寔冥求於罔象以不器之器是資以不言之言為
上存於身則大智之閑閑移於邦則王道之蕩蕩喻鳴
鐘之大小物莫我欺取膠柱於樞機吾將安仰大哉卮

也者既異敲器且殊漏卮言也者亦匪確論又非詭隨
知萬物之種也奚千里而應之智過挈瓶槁杙之書徒
爾信踰盈缶連山之象云為故曰不言則齊同形相禪
巧如簧兮非偶卒若環兮無變得之者毀譽兩忘失之
者是非交戰詳夫卮有空滿於義則那言無準的在理
云何亦猶君不言而黔首化天不言而玉燭和是以大
道五千取不知而立誠寓言十九藉外論以同波今我
后據北極之尊窮南華之旨思欲體清淨而率兆庶故

先命詞賦而試多士盛乎哉崇道之名不為虛美

慎所好賦

以重譯獻珍信
非寶也為韻

唐闕名

君子嚴其牆仞戒以心胷知耽味之易入俾回邪而不
容其慎德也白圭是聞其三復其好賢也緇衣必薦其
九重自然契已坦蕩清心肅雍玩喪志而何有欲敗度
兮何從昔如王者三朝遠人重譯執贄山委獻琛雲積
豈不知納寶庫為子孫之藏映玉墀嘉戎夷之績蓋以
難得之貨有損不貪之寶無數獲狼而荒服不臻却馬

而漢王受益嗤虞公受玉之敗美晉帝焚裘之迹匪騁
欲而適願將去奢而無怨滿堂足戒黃金寧慎其四知
連城不求白璧何勞於三獻所愛者禮所懷者仁君由
之而又國士用之以防身衣服有常非敢玩於千襲飲
食不瀆寧專美於八珍其受才也必擇能而得儔其慕
友也亦資忠而履信將辭直而不違知言甘而有吝是
窒其欲無忽於微五色足耽審之則朱紫不奪八音可
樂慢之則鄭雅同歸思禁邪而制放慮今是而昨非上

則宣風下同偃草將還淳而復樸在耽德而味道蒐田
失度則念虞人之箴慈儉或虧必思老氏之寶至矣哉
好之者儒以多聞為潤屋立義為分社孝既慕於參乎
學願從於回也孜孜屑屑束修問寡如此人所以銘座
而弗忘書紳而不舍

同人于野賦

以君子之道何往不通為韻

唐周 鉉

善本身修名由道長惟君子之所履遇同人而遂往不
修正直誠邪枉於出門既叶於心視野郊於指掌守柔

以處亦何後而何先秉健而行諒無偏而無黨蓋以居謙不躁應上潛通欲垂文於天下須立志於胷中雲合霧開孰無機於豹變聲馳響答皆有意於雷同必使量統含弘義資探討包利貞而共濟顧言行而相保情田波注將符若水之時德宇馨香用法如蘭之道乃言六二是乘柔之主九五為行健之資乘乎柔而何剛敢奪行乎健而何往不之況能辨方知類視險如夷念同氣以遵彼實忘言而在茲於以審吉凶較能否始居中而

體正終處上而為首理方求友喻伐木以攸宜義在同
心於斷金而誰有所期利比浮雲悠然莫分光於身者
曰道聲於教者曰文故得退無失位進得其羣將果行
以育德候移忠而事君則知福應無他元亨由己理契
和順心惟知止不然何以風雲偶會咸為得路之人悔
吝不生盡似同舟之子別有勵志彌久勞謙已多既考
之於六位亦化之於四科且如今日之進也道如之何

鳥求友聲賦

以人自得求友
聲之道為韻

唐王 榮

日暖風輕有黃鳥兮間關嚶嚶始乘春而出自幽谷俄
擇木而求其友聲尚沮羣猜每念載鳴之侶方期類聚
詎無相應之情於是紅破園桃青勻禁柳韶光媚原野
之始宿雨霽池塘之後由是睨睨遷喬棲翔寡友潛符
切切之義爰發嚶嚶之口林間乍嘒誠謂乎知音可期
陌上頻啼似恨其離羣已久既而雅叶交應如懷故人
得鸚鵡之流言不信見靈鳥而白首如新灌木煙中念
友朋而有待楊園景裏豈鳩集之無因鳴毫既殊攀稽

靡異猶角徵之先奏俟宮商之有自遂使夕陽橋畔人
增感別之愁曉色樓前處處動傷春之思族類安在
間關未休想王睢兮從吾所好知斥鷃兮謂我何求豈
比蜀魄銜冤啼巴月於深夜燕鴻失侶叫邊雲於凜秋
懿夫隔霧彌幽含風轉好似弘三益之旨足警寡聞之
抱想伊鳥也猶推故舊之心矧乃人斯忍棄友朋之道
取則寧遠流音在茲爾苟嚶鳴而占矣吾將德義以求
之雖慕惠莊願定交於他日如令管鮑得擅美於當時

夫如是則結綬何慙彈冠不惑伐木將廢而莫可谷風
欲刺而安得已乎勿謂斯鳥之聲至微而忘其是則

松柏有心賦

唐王 榮

彼木雖衆何心可持惟松柏其生矣稟堅貞而有之所
以固節千歲凝芳四時積翠森疎見冒雪停霜之性攢
空蕭瑟無改柯易葉之期懿夫外聳原本闕直或盤根於

幽磎之畔或挺資於高山之側

原本闕
三字

桂何慙荆棘葉殊

而可謂不同節厚而盡云難測相連夾路在成城而稍

侔未可為薪比死灰而莫得媿匪石而枝勁叶懸旌而
影搖苟無懼於早落亦何憂於後雕聳榦山顛且甚長
於衆植成行陵上終不亂於驚飈矧乎萬樹含秋千林
向晚方見夫鶴棲之所彌茂麝食之餘不損天台溪畔
若有意以垂陰太華峰前豈無情於固本既立端操寧
驚大寒似蓋而秦封翠斂如愁而殷社煙攢勢迴蒿萊
競高標於塵外時當搖落爭秀出於林端豈無井上之
桐亦有園中之桺於春色以自得在歲寒而則不曾未

若方寸斯抱層空可凌霍雖傾而莫比蓬非直而何稱
至如嚴氣方勁翠色猶增亦何異君子仗誠處難危而
愈厲志人高道當顛沛以彌弘是知斯木惟良因心所
貴各固結其修幹共青蒼於四氣然則喻禮於人欲舍
此而何謂

跬步千里賦

以審乎致遠行
之在人為韻

唐王 榮

彼道雖遠惟人可行積一時之跬步臻千里之遙程亦
如塵至微而結成山嶽川不息而流作滄瀛是則大自

小成遐因邇至理苟均於積習義必資乎馴致莫不究
其攸往明其所自不因布武之間那及同舟之地終尋
高躅必可繼於飛鴻不躡前蹤安得齊於赤驥是則欲
追迢遞無或踟躕始謂與其進也不亦遠乎玉趾勤遷
諒金城之可越芳塵漸

原本闕
三字

水之難逾矧夫高以下為

著顯以微為本既曳踵以將至蓋執心而忘返行行莫
止豈辭明月之程去去不停寧憚黃雲之遠但勉行之
終能及之苟循途而坦坦盍履道以孜孜如肯裂裳自

等聚糧之義豈勞由徑當齊命駕之期得非務進彌專
遄征有稟念踽踽以無急故僬僬而滋甚自勤跋涉邯
鄲之學全殊不暇因循燕宋之遙可審然而志勿休者
雖難必易行不止者雖遠必臻亦猶積水為瑩冰之始
層臺實累土之因大道能遵終及奔馳之子中途儻廢
誠慙跛躄之人別有跼踖負來躊躇斯在將欲跋跡霄
漢超蹤寰海或能開道路解紮維則千里之途可待

天秩有禮賦有序

宋陳普

先儒曰天專言之則道也又曰天即理也夫以形體而言謂之天以主宰而言謂之帝其實即一自然之道體也秩者品位之次序也朱子曰禮之為體雖嚴而皆出於自然之理所謂天秩有禮者也禮者聖人之所制而實皆天則之當然天理之自然天道之本然聖人不過循之而已舜之無為禹之無事文王之不知不識順帝之則皆此事也有者天理之所本有當有人心之同然非本無此理而獨出於聖人之所作為者也

夫禮即道妙體居用先非人為而始有皆天秩之當然
莫高覆燾之形一原從出寔敘節文之禮萬善皆全聞
之帝則之中無在不然王道之行以斯為美燦然截然
和以為貴主是張是命之不已禮之秩也豈獨出於聖
人性所有焉一皆本於自然主宰謂帝性情曰乾心則
人心之妙體皆道體之全不已文王常在左右何言孔
子初無後先禮之制也初不在我理之因也皆自於天
大矣無私乃物類之太初太始截然有序為人倫之三

百三千茲蓋皇矣臨下辨上下之等差高而聽卑定尊卑之位次本原已具於定則毫髮不容於小智父子君臣皆大學之當止爵齒昭穆本中庸之不離有者其初非強而有自然之理當知所自高也明也渾然太極之純全品斯節斯同是一初之付畀大抵天理流行散作蒸民之則聖人制作初非有意之私一事一理不造之妙造五品五教無為之至為欲識制度品節文章之本當歌出衍出遊文王之詩孝子忠臣天理素定尊君嚴

父天威莫欺本然定者之謂秩有者生民之秉彝敬主
於心隱若運行之不已讓形於外顯然道理之相推孰
不謂衣裳之制垂自黃唐玉帛之儀修於虞夏夫子教
人鄉黨朝聘周公體國禘嘗郊社豈知萬殊一本有素
定之裁制百聖羣賢非妄為之虛假禮焉所謂體焉人
也實皆天也室家男女妙陰陽二曜之合離堂陛尊卑
昭南北兩樞之高下是何漢晉隋唐不為堯舜禹湯金
張許史無復孔顏孟思夫婦之別誰得文王之太姒兄

弟之倫未若叔齊與伯夷豈非天序天常上聖能盡天
精天粹淺心莫窺雖禮之所在皆天秩之常也然道不
虛行必人存而舉之所以聖學流傳斷以大人之語帝
朝儀論斷之自我之辭又當知化成於禮非教則不成
政舉於人何由而得舉禮義之民皆出於禮樂禮樂之
士悉由於庠序不然則民命不立士習不善而一以三
綱五典委之天事物何由而得所

道不遠人賦

宋陳普

道本同得學惟反思不於人而遠也率吾性以為之即是理之常行稟生則具取諸身而皆有莫近於斯聞之天賦性命之正皆在吾身日用之常莫非至理渾然全體至善至粹凡厥有生甚親甚邇所當行者命則然而性則然夫豈遠乎人在此而道在此是道也本太極體為天地公坦易明白流行貫通視聽貌思各有天倫之極喜怒哀樂俱全未發之中並生天地均賦均得豈有須臾不偕不同是謂理然不過云為動靜其於我也未

嘗南北西東道者何也父慈子孝兄友弟恭男外女內
君上臣下皆自近取初何外假但求於我欲則至矣如
在於室未之思也人者仁也不亦善乎道即性焉又何
遠者即是訓是行之洪範並受共由凡有物有則之蒸
民有操無舍大抵人之相去雖尺寸以異地理之同得
無毫釐之離人塞吾體帥吾性何止戶庭見於面蓋於
背本無主賓信知一理之費隱常與四支而屈伸恭常
在手重固在足正豈外心修寧外身固無毫髮之疎遠

但用工夫於率循影形響聲尚有彼之與此天水地火
猶分類以殊倫自陰陽二氣賦質化生而健順五常同
時付託純四體之中默然自喻隨百感之來順時如躍
暗者顧之有如天壤胡越明者取之若在苞苴囊橐求
之斯得舍之斯失離之則非由之何莫所謂不下帶而
存夫豈如捕風之若所以孟軻洞見但求端於性情劉
子深知惟驗中於動作噫禮樂散殊充周於天地高大
夫婦知行昭晰於鳶魚躍飛序別見於鴻鴈睢鳩之小

仁義見於豺狼螻蟻之微彼兩間有萬皆與道以無間
此三才居一豈有時而或違去道而遠曰仁則非胡乃
慕彼糠麋忘肥甘之在己棄其蘭茝蘇糞壤以充幃又
當知月至而已者忘逆旅之非家日用不知者昧自身
之有寶冥行方寸邈若海山明於一念取之懷抱此孔
子於豈不爾思室是遠而之詩而以未思言之教求道
者但用心於內也已

得意忘言賦

以去象棄詞根
乎幽朕為韻

唐謝觀

易意難見言以存之得意之後而言可遺本憑詮以指
昧既達誠而去詞昔者先王玄通默想以深指難可擬
議嗟後世無不瞻仰是以錯綜六爻森羅萬象立文以
寓其吉凶蹟隱以知其來往憑有狀之狀而定其範圍
因可名之名以徵其影響悟影響則可名之名息達範
圍則有狀之狀無執可名為常名者謬定有狀為常狀
者愚方知禮以適變作事之符符以觀設遵意之樞但
魚兔之得也於筌蹄而已乎然則言者意之苗得意而

根源有據意者言之本得本而枝葉不御假以寄誠明
為定據如鑽燧求火獲火而燧之可忘似剖蚌求珠得
珠而蚌之可去於戲置文字之館植玄牝之根自入存
存之室廢乎察察之門不爽毫釐經濟無為之內匪差
黍累彌淪有截之垠既而搜未形之形索無朕之朕變
以喻而立幽藉明為準則可棄喻取變即明討幽不可
以理縛難可以文囚遇陽則明豈必離乃為日遇陰則
順何須坤乃為牛夫如是稽其意窮其事旁通其閭闕

曲盡其精義英華可採桎梏斯棄儻究忘言之機庶叶
表微之思

人不易知賦

以題為韻

唐郭適

墳索通旨古今彝倫惟沖虛以效迹貴特達而知人有
藏器在我有從方立身歷九徵而觀則甄一德而求真
既而糾合性情交驅馳驟莊列談其險艱堯舜病其授
受玉石相蔽悲獻璞之匪工媒介未孚忌投珠而自久
考聲度之軌躅察言貌之休咎鑒之則理將斯契昧之

則亂何不有彼經緯之區分在昭擇於能否復覽前志
清通不易或失子羽之容或失宰我之議自非識周郎
之顧曲辨齊竽之濫吹安能取士於飯牛之時拔才於
卧龍之器其道或如蘭芷應以塤箎聞撤俎而興歎指
負甌而留規管仲霸齊終慟哭於鮑叔國僑相鄭始登
舉於子皮此則秦鏡一覽而皆得何必豫章七年而見
知別有事業後時徘徊中路厭東郭之雪隱南山之霧
猶恐相士者失之於下流披文者棄之於異趣苟名實

之斯在願曲直而成喻徒叩寂於不材實有慚於能賦

愛而不見賦

有序

唐
蕭穎士

丙辰歲待詔京邑貽舊知作

嗟乎或愛之而不見者有之矣何必周秦異代夷夏殊
軌阻嚴城之九重限方舟之一水苟時事之多怨故人
遐而室邇關山起於足下堂上遠乎千里聳專專之目
成遽將逝而復止詩人所以思婉孌而搔首賦城隅之
有俟吁不得其已也惟夙昔之良會夢佳期於北方款

渤澥之三山吸流霞之景光含芳詞以況予云惠好之
不忘願報義於永日陪遊宴於帝鄉廣莫忽而號怒鯨
波洶而騰張俄驚魂以輟寐問窮髮之茫茫將揭厲以
復從駭風濤之匪量思投軀以靡吝撫遺體以競惶晨
切切以悽悽夕屏營以彷徨追前歡之俯邇歎此恨之
悠長於是收神返慮澄澹靜默冥然就寢兀若無識冀
良宵之復遇希舊遊之可即徒有願兮且未克憂深沉
兮萃胸臆風兮雨兮思君子兮何極

心鏡賦

唐楊慎虛

嘗觀夫乾位始造坤儀廣生運元和而產氣因自有而含精萬靈羣分立圓形以標貴四體成物包寸心而致亨含妙有而存象賁虛無而自明故其端以居中動不違正藏牝谷而為主闢靈臺而作鏡將黷之而不昏因澄之而彌靜既剗邪而窒慾忽窮理而知命然後和精神明情性俾存存而不惑恒皎皎而孤映由觸類而感有為必因象物知器乘時利人數禮經以導俗馳精義

以入神探禍福而知運任行藏而理身所以君子處順
而情逸明王不言而化淳若乃潛英議蓄明斷欲鴻蒙
而未析勿冒昧而相亂凝至精而一臨俾羣疑而四散
故使立身者潔之而清真自守入官者朗之而美化攸
贊語衆妙之玄通分萬殊於大觀然則物以心鑒心由
物遷掇輕花而意豔坐孤石而情堅所以去彼取此削
觚為圓將欲保至和而不撓存大樸而自然茲會有體
彼管攸設選賢而官知人則哲端靈心之朗暢拂清鏡

之光潔取舍妙諧於物宜推擇靡遺於井渫遣許郭而
齊鑒與山盧而比傑可謂張英風著徽烈嗟小子之庸
蔽撫蓬心而望絕

至人用心若鏡賦

以方寸虛地有
來斯應為韻

唐
紇干俞

睠理心之至者有明鏡而比諸皎然可鑒泊然其虛舍
將迎之載勤無情是得存好惡之不辨何狀不儲彼誠
之明惟道斯守居中自執於精一待物豈殊乎先後云
誰鑒矣則用當其無匪我功焉乃為而不有淵兮內照

曠若虛受伊默慮其智愚儼分形於美醜稽至理也其
性命哉瑩爾蒙蔽滌乎氛埃引曜弘納清明洞開自外
爰依叶彼生而有象由衷必應體夫神以知來故得稱
有別於宏規等無私於衆類苟觀過之能審爰見疵而
不愧始求義於昭昭卒窮微於至至和平自保非險乎
山川容貌既呈必肖乎天地美夫鑒乃不臧勝而無傷
恒其德匪明而匪晦狀於物或圓而或方仰周文之翼
翼同叔度之汪汪是知弘量資乎日宣儲精本於明證

鏡將心而共理影與形而合應思負局之克修並懸心而有稱感物攸在立誠取斯彼範金之遺制信靈府以相隨吾道方存庶一觀而無替其明固久亦屢照而忘疲想夫朗若爰啓靜而無悶比申監於盈尺願修容於進寸樂廣播披雲之詞莊生諧止水之論冀因照以玄鑒豈逢時而在困

至人心鏡賦

以人心融道清
鑒應物為韻

唐于可封

莊生有言曰至人用心若鏡有旨哉是言也夫鏡也者

以明為體是故有來而必應心也者以靜為照亦可不思而玄通拂拭生光掛新臺而月滿罔象求得映赤水而珠融若鍊心而比鏡信清明而在躬爾乃以鏡為心因心載考菱花發而羣象生靈府開而萬物保斯鏡之精明謂人心得道至人所以卑其性而遺箴弱其志以虛襟聽無聲之和樂天籟之音明白四達照幽燭深希洞視而玄鑒在無心而用心苟能忘已作虛舟之泛必保其光得秦鏡之鑒我邦君皇宗之子天人之英體以

合道沖融混成其用心也達至人之妙理其朗鑒也同
水鏡之澄清開意而圓照吐心而自明妍媸莫能藏其
象鬼神莫以遁其情絕母意與母我固不將而不迎懸
彼高鑒求乎有貞覩處子兮調脂粉爭捧心兮效蹙頰
醜者自醜新者自新形美惡而區別吾何情於知人媿
匪桃夭寧容比證對香奩而呈貌慮柔姿而不稱有待
良人非徒好勝因茲佇賞必冀象應紅粉蛾眉趨而競
謁究其素質髣彼玄髮類芙蓉之映水若姮娥之向月

大明無私衆鑒不歇光之所燭照及微物庶有假於恩
輝幸留心於翦拂

靈臺賦

唐
韋承慶

歲已殫夜向闌風威勁霜氣寒月斜臨於棟杪河半落
於簷端心耿耿而不寐魂煒煒而未安乃振衣危坐隱
几太息繹思於今古之津佇懷於天地之域粵若天分
地開古往今來物之播焉成萬品人之生也配三才伊
生人之為貴咸賦職於靈臺彼靈臺者含粹而起惟神

所止想四大之樞機執五成之端揆統精靈之往復括性命之終始坎憑慧而宣聽離假明而暢視六儀竦而承尊百骸運而為使若衆星之拱璿極猶列國之宗王宸夫其鼓動陶甄範圍涵育質微用廣如土圭之準盈縮精靈器要譬灰琯之調涼燠撫二儀之斡運必用此而休復閱庶類之區分亦俟茲而大畜與室資明於洞戶飛軒寄轉於輕軸靈筠挺防露之篁孤穎秀捎雲之木其高也巍乎峻峙傑爾孤標上千日月迴冠雲霄其

深也如海之渟如淵之邃宵萬仞兮沉以清潛九重兮
隱而閔其平也周道如砥君子之夷局其險也蜀門若
劒小人之跂躅彌性場而極覽溥情囿而環矚鮮開曠
而閒凝多鬱堙而窘促萌一緒而千變兆片機而萬觸
無半刻而恬想乃終年而汨欲大木百圍而竅竅長河
九支而屈曲怒則烈火扇於衝颿喜則春露融於朝旭
懼驚懷其若墜憂結念其如束或漫漫而川浮或迢迢
而山屬繁襟霧合而煙聚覃思鍼懸而縷續其騫時也

似飛蛾凌亂而投明燭其趨利也若饑鳥聯翩而爭場
粟力方躡而獨騁量已傾而未足吹劒首而聒虞韶握
碣磳而銜荆玉纖埃不讓於山阜巨海見排於井谷沉
浮兮靡定去就兮多途乍排下而進上忽出有而入無
轉息而延緣萬古迴瞬而周流八區形寥寥於衽席慮
淼淼於燕吳乃榮乃華如馳如驅甚飛猱之躑喬木邁
奔兕之逸修衢雖杼軸而無已吾未知其所圖爾其清
濁兩資臧否兼司有縵者而密者幾附之而益之勇怯

於焉競爽明晦所以相欺或外靜而中躁或情慍而顏
怡或趣睽而迹偶或言信而誠疑眉睫兩連而相對山
河萬重而在茲莫覩其深沉之實抱徒見其俯僂之虛
姿類陰陽之不測匹神鬼之難期不可審之以權量不
可卜之以蓍龜爭度長而自我各守勝而為師設皇綱
而懸帝制張地絡而舉天維雖衆條之所撿轄在斯輒
而不能持徵善惡於遥祀訪賢愚於羣冊軒昊用之而
司契堯舜守之而光宅湯武任之以為王桓文仗之而

作伯弘聖道者謂之周孔肆凶德者攝為桀跖體仁成
曾史之行毓智舉良平之策六國起爭交之端三方構
鼎峙之迹政焚書而騁暴巨誦典而崇僻誣讒胥而獲
誅斬譖原而受斥軻發匣而揮匕如睨楹而抗壁蕭朱
始諧而末釁餘耳初好而終隙寵包詐而昵躬牢蘊邪
而附石究迴冗於今古鬱續紛於載籍匪外物之所嬰
諒乃心之攸敵若乃無損無益不盈不沖湛虛明其若
鏡坦宏量其如空靜凝神而合道動應物而修功得至

無於象外乘妙有於寰中既昭合而懸解且兼忘而大同象罔之珠易索橐籥之用無窮入窅冥而起宇宙翔寥廓而矯樊籠斯上聖之神理邈先幾而感通諒凡情之靡得徒仰止於余衷至於宅義依仁棲貞履順崇禮讓之局閨聳溫恭之牆仞赴鯁壑而全忠處龍鄉而執信情居損而能酌時處遯而無愠遊書圃而撫芳挹文河而澡潤循雅度而成則服嘉言而遣吝乃懿士之清規定吾人之所徇持弱操而知勉飭微躬而底慎思不

伎而不求絕相靡而相刃慨投筆而長想聊綴音於末
韻

天道如張弓賦

宋 王禹偁

上天如之何匪謙莫益張弓如之何匪高莫抑瞻倚杵
之為狀考彎弧而取則所以老氏順之以立玄言王者
法之而建皇極豈不以天寔虧盈弓唯審固既命中以
有式若無親而設喻善惡之效自應弦而靡差禍福之
祥同流矢之所注吾嘗觀善射之人如天道兮有倫下

者舉其勢高者俯其身左馬右人落穀中而不失十發
九中視掌上而彌親又嘗觀上玄之理與張弓兮匪異
損有餘以示誠補不足而平施小人用壯唯六極而是
惟君子好謙乃百祥而咸萃又嘗觀上聖之姿法天道
兮緝熙令見禁於強暴心不忘於惇嫠百姓與能自樂
財成之道四時咸序爰歸輔相之宜天之道也既如彼
弓之義也又如此懿乎男子之事克叶聖人之旨自可
移於邦求諸己蓋裒多益寡者焉唯舉下抑高而已夫

如是則張其弓挾其矢體由基之所長天道遠人道邇
非禪竈之能量是以君者撫其弱抑其強如猿臂之盡
妙中鵠心而允臧向使天理或爽君道靡常自然反時
而反德又烏可稱帝而稱王者哉故曰孰能以有餘奉
天下唯有道者

天衢賦

以亨達之路無
復凝滯為韻

宋 文彥博

否窮必泰畜極當亨取天衢而垂喻在易象以著明孰
謂乎險不可升半途則廢誠因乎利有攸往直道而行

原夫乾以剛升艮能柔遏卦成大畜之象亨在六爻之末言其天者示吾道之高明譬彼衢焉表時途之洞達徒觀其蕩蕩罔極平平甚夷必在與其進也方可跂而及之將列曜以同遊曾無險阻與羣龍而共躍迴出喧卑廣矣亨塗坦然大路小人才進以無便君子階升而有素遠者近者自當開泰之時何斯違斯詎見艱難之步豈不以屈伸道異窮達路殊困躋率由於邪徑起騰究在於康衢瑣瑣管闕固上行而莫有區區跋履信高

蹈以應無蓋以本乎天者悠遠而不窮況於衢者遵循而惟速既亨達之有遂則制畜而無復初惟藏密同鶴鳴之在陰終乃升高類鴻漸而及陸偉乎高連雲漢直比絲繩將何人之率履欲誰氏之先登上士行之而克勤大勲必集王者蹈之而不返庶績咸凝若然則道遂坦夷往無凝滯豈惟推四達之廣蓋將及九重之際何當履此高衢振芳蹤而出世

欽定四庫全書

御定歷代賦彙卷六十九

性道

太玄賦

漢揚雄

觀大易之損益兮覽老氏之倚伏省憂喜之共門兮察
吉凶之同域皦皦著乎日月兮何俗聖之暗燭豈惛寵
以冒災兮將噬臍之不及若飄風不終朝兮驟雨不終
日雷隆隆而輒息兮火猶熾而速滅自夫物有盛衰兮

况人事之所極奚貪婪於富貴兮迄喪躬而危族豐盈
禍所棲兮名譽怨所集薰以芳而致燒兮膏含肥而見
燭翠羽嫩而殃身兮蚌含珠而擘裂聖作典以濟時兮
驅蒸民而入甲張仁義以為網兮懷忠貞以矯俗指尊
選以誘世兮疾身沒而名滅豈若師由聃兮執玄靜於
中谷納僞祿於江淮兮揖松喬於華嶽升崑崙以散髮
兮踞弱水以濯足朝發軔於流沙兮夕翱翔於碣石忽
萬里而一頓兮過列仙以託宿役青要與承戈兮舞馮

夷以作樂聽素女之清聲兮觀宓妃之妙曲茹芝英以
禦餓兮飲玉醴以解渴排閭闔以窺天庭兮騎騂驄以
踟躕載羨門與儷游兮永覽周乎八極亂曰甘餌含毒
難數嘗兮麟而可羈近犬羊兮鸞鳳高翔戾青雲兮不
掛網羅固足珍兮斯錯位極惟大戮兮屈子暮清葬魚
腹兮伯姬曜名焚厥身兮孤竹二子餓首山兮斷跡屬
鏤何足稱兮辟斯數子智若淵兮我異於此執太玄兮
蕩然肆志不拘攣兮

疾邪賦

漢趙壹

伊五帝之不同禮三王亦又不同樂數極自然變化反駁德政不能救世溷亂賞罰豈足懲時清濁春秋時禍敗之始戰國愈復增其荼毒秦漢無以相踰越乃更加其怨酷寧計生民之命唯利己而自足於茲迄今情偽萬方佞諂日熾剛克消亡舐痔結駟正色徒行嫗媼名勢撫拍豪強偃蹇反俗立致咎殃捷懾逐物日富月昌渾然同惑孰溫孰涼衰夫顯進直士幽藏原斯瘼之攸

興寔執政之匪賢女謁掩其視聽兮近習秉其威權所
好則鑽皮出其毛羽所惡則洗垢求其癰痕雖欲竭誠
而盡忠路絕嶮而靡緣九重既不可啓又羣吠之狺狺
安危亡於旦夕肆嗜欲於目前奚異涉海之失柁積薪
而待然榮約由於閃輸孰知辨其蚩妍故法禁屈撓於
勢族恩澤不逮於單門寧飢寒於堯舜之荒歲兮不飽
煖於當今之豐年乘理雖死而非亡違義雖生而匪存
有秦客者乃為詩曰河清不可俟人命不可延順風激

靡草富貴者稱賢文籍雖滿腹不如一囊錢伊優北堂
上翫髒倚門邊魯生聞此辭繫而作詩曰勢家多所宜
咳唾自成珠被褐懷金玉蘭蕙化為芻賢者雖獨悟所
困在羣愚且各守爾分勿復空馳驅哀哉復哀哉此是
命矣夫

思遊賦

有序

晉 摯虞

虞嘗以死生有命富貴在天天之所祐者義也人之所
助者信也履信思順所以延福違此而行所以速禍然

道長世短禍福舛錯怵迫之徒不知所守蕩而積憤或
迷或放故借之以身假之以事先陳處世不遇之難遂
棄彞倫輕舉遠遊以極常人罔惑之情而後引之以正
反之以義推神明之應於視聽之表崇否泰之運於智
力之外以明天任命之不可違故作思遊賦其辭曰

有軒轅之遐胄兮氏仲壬之洪裔敷華穎於末葉兮晞
靈根於上世準乾坤以幹度兮儀陰陽以定制匪時運
其焉行兮乘太虛而遙曳戴朗月之高冠兮綴太白之

明璜製文霓以為衣兮襲彩雲以為裳要華電之煜爚
兮佩玉衡之琳琅明景日以鑒形兮信煥燿而重光至
美詭好於凡觀兮修稀合而靡呈燕石緹襲以華國兮
和璞遙棄於南荆夏象韜塵於市北兮瓶壘抗方於兩
楹鸞凰耿介而偏棲兮蘭桂背時而獨榮關寒暑以練
真兮豈改容而爽情感昆吾之易越兮懷暉光之速暮
羨一稔而三春兮尚含英以容豫悼曜靈之靡暇兮限
天晷之有度聆鳴蜩之號節兮恐隕葉於凝露希前軌

而增驚兮眷後塵而旋顧往者倏忽而不逮兮來者冥
昧而未著二儀泊焉其無央兮四節環轉而靡窮星鳥
逝而時返兮夕景潛而且融旻三后之在天兮款聖哲
之永終諒道修而命微兮孰舍盈而戢冲握隨珠與蕙
若兮時莫悅而未遑彼未遑其何恤兮懼獨美之有傷
蹇委深而投奧兮庶芬藻之不彰芳處幽而彌馨兮寶
在夜而愈光逼區內之迫脇兮思攄翼乎八荒望雲階
之崇壯兮願輕舉而高翔造庖犧以問象兮辨吉繇於

姬文將遠遊於太初兮鑒形鬼之未分四靈儼而為衛
兮六氣紛以成羣駢白獸於商風兮御蒼龍於景雲簡
廝徒於靈囿兮從馮夷而問津召陵陽於游谿兮旌王
子於柏人前祝融以掌燧兮殿玄冥以掩塵形影影而
遂遐兮氣疊疊而愈新挹玉膏於萊嶠兮掇芝英於瀛
濱揖太昊以假憇兮聽賦政於三春洪範翕而復張兮
百卉隕而更震睇玉女之紛影兮執懿筐於扶木覽玄
象之韡曄兮仍騰躍乎暘谷吸朝霞以療饑兮降廩泉

而濯足將縱轡以逍遙兮限東極之路促詔纖阿而右
迴兮覲朱明之赫曦莅羣神於夏庭兮迴蒼梧而結知
纚焦明以承旂兮馭天馬而高馳讒羲和於丹邱兮誚
倒影之亂儀尋凱風而南暨兮謝太陽於炎離戚溽暑
之陶鬱兮予安能乎留斯聞碧雞之長晨兮吾將往乎
西游粵浮鷁於弱水兮泊舳艫於中流苟精粹之攸存
兮誠沉羽以汎舟軼望舒以陵厲兮羌神漂而氣浮訊
碩老於金室兮采舊聞於前修譏淪陰於危山兮問王

母於椒邱觀玄鳥之參趾兮會根壹之神籌擾覺兔於
月窟兮詰姮娥於蓐收爰攬轡而旋驅兮訪北叟之倚
伏乘增冰而遂濟兮凌涸陰之所蓄探龜蛇於幽穴兮
瞰罔象之潛育哂儵忽之躁狂兮喪中黃於耳目偃燭
龍而游衍兮窮大明於北陸攀招搖而上躋兮忽蹈廓
而凌虛登閭闔而遺眷兮頻玄黃於地輿召黔雷以先
導兮覲天帝於清都觀渾儀以寓目兮拊造化之大爐
爰辨惑於上皇兮稽吉凶之元符唐則天而民咨兮癸

亂常而感虞孔揮涕於西狩兮臧考祥於僂句跼肆暴
而保乂兮顏履仁而夙徂何否泰之靡所兮眩榮辱之
不圖運可期兮不可思道可知兮不可為求之者勞兮
欲之者惑信天任命兮理乃自得且以四位為匠乾以
為均散而為物結而為人陽降陰升一替一興流而為
川滯而為陵禍不可禳福不可徵其否兮有豫其泰兮
有數成形兮未察靈象兮已固承明訓以發蒙兮審性
命之靡求將澄神而守一兮奚飄飄而遐遊斐陳辭以

告退兮主悵惘而永歎惟升降之不仍兮詠別易而會
難願大饗以致好兮盍息駕於一餐會司儀於有始兮
延嘉賓於九乾陳鈞天之廣樂兮展萬舞之至歡枉矢
鑠其在手兮狼弧翔其斯彎睨翟犬於帝側兮殪熊羆
於靈軒爾乃清道夙蹕載輪修祖班命受號轡輶整旅
兆司鬱以屈路兮萬靈森而陳庭豐隆軒其警衆兮鈞
陳帥以屬兵堪輿竦而進時兮文昌肅以司行抗蚩尤
之修旃兮建雄虹之采旌乘雲車電鞭之扶輿委蛇兮

駕應龍青蚪之容裔陸離俯游光逸景倏爍微霍兮仰
流旌垂旄炎攸纖纚前湛湛而攝進兮後傑傑而方馳
且啓行於重陽兮奄稅駕乎少儀跨列缺兮闚乾以揮
玉關兮出天門涉漢津兮望崑崙經赤霄兮臨玄根觀
品物兮終復魂形已消兮氣猶存眺懸舟之離離兮懷
舊都之藹藹仍繁榮而督引兮將遄降而速邁華雲依
霏而翼衡兮日月炫晃而映蓋蹈烟煴兮辭天衢心闔
曷兮識故居路遂適兮情欣欣奄忽歸兮反常閭修中

和兮崇彝倫大道繇兮味琴書樂自然兮識窮達澹無
思兮心恒娛

悔賦

有序

梁簡文帝

夫機難豫知知機者上智智以運己迷己者庸夫故易
曰吉凶悔吝生乎動者也又曰悔吝者憂虞之象也傳
曰九德不讐作事無悔是以鄭國盜多太叔之恨表衛
風義失宣公之刺彰無將詠興壟事書作季文再思而
未可南容三復而不暇余以固陋之資慎履冰之誠竊

服楚王之對每徵后稷之詩觸類而長乃為賦曰

默默不怡恍若有遺四壁無寓三階寡趣月露澄曉風
柳悲暮庭鶴雙舞檐烏獨赴岸林宗之中憑南郭之几
玄德之眊聊縈子安之嘯時起靜思悔吝鋪究前史弔
古傷今驚憂歎圯成敗之蹤得失之理莫不關此令終
由乎謀始棄夸言於頓邱重前非於蘧子蹟夫覆車之
戒豈止一途而已至如秦兼四海之尊握天下之富混
一車書鞭笞宇宙胡亥之寄已危萬代之祀難構阿衡

失責成之所趙高秉棟梁之授拒諫逞刑戮宰誅守矜
上林之戲馬嘉長楊之射獸囁咄禁中之言欺侮山東
之寇及其祠崇涇水作囂夷宮徒希與妻子伍下願與
黔首同信殪絕於凶醜何前謀之不工至如下相項籍
才氣過人拔山靡類扛鼎絕倫聲駕盛漢勢壓餘秦鉅
鹿有動天之卒轅門有屈膝之賓既刊有功之印亦疑
奇計之臣唱雞鳴於垓下泣悲歌於美人抱烏江之獨
愧分漢騎之餘身郭君失位徒馭而亡尚悲殘糗獨飲

餘漿枕畚空卧伏軾懷傷魂飄原野骨餌豺狼楚王刻
鶴播徙南地鏡管徒鳴才人空置豈輜車之足榮匪射
獵之娛意幽泉斯即白日何冀寧喜納君恃功肆寵衛
侯厭黷忠臣憤勇昏迷靡悟敗不旋踵商君被執李斯
赴收身居闕下命厄秦囚追傷用法之弊還思不諫之
尤亦何解於今酷終無追於昔謀伯卓跋扈豺目為輔
弑君鴆子誅李害杜黨恩販寵怨庶虐人蔽朝政之聰
察害上書之烈臣榮暱子於阿尹肆貪濁之淫威樹姦

黨於宮禁察人主之纖微卒其膏鈇潤鉞寘繆逢微壯
武英逸才為時出陸離儒雅照爛文筆江東啓吞併之
籌幽州著懷遠之術運鍾毀冕時屬傾顛竊鳴水闊日
黑山遷劉卞之謀不決忠良之戮已纏台曜之災雖啓
鷗鷁之賦徒然士衡文傑綽有餘裕氣含珠璧情蘊雲
霧志闕沉隱心耽進趣倨茲猛衆臨此勁兵抗言孟玖
肆此孤貞賤辭已切墨慢徒縈形殞河上心憶華亭若
夫楊惲狂言灌夫失志卒其殞命埋軀傷形屬吏周君

飲後裴子酣狂靳固紀瞻之妾眠卧季倫之房亦足以
魂驚神爽悔結嫌彰已矣哉波瀾動兮昧前期庸夫蔽
兮多自欺不遠而復幸無嗤建功立德有常基曾馳臆
斷多失之前言往行可為師

思慎賦

有序

唐 劉知幾

賦形天地受氣陰陽生樂死哀進榮退辱此人倫之大
分也然歷觀自古以迄於今其有才位見稱功名取貴
非命者衆克全者寡大則覆宗絕祀堙沒無遺小則繫

獄下室僅而獲免速者敗不旋踵寬者憂在子孫至若
保令名以沒齒傳詒厥於後胤求之歷代得十一於千
百其嘗迹其行事畧而論之至如望夷篡奪鴻溝戰爭
包燕蓋之異志踐恭顯之邪迹或干紀亂常或窺窬僥
倖此而獲罪固其宜也爭二城而相殺期五鼎以就烹
獻魚炙以交鉞舞雞鳴而伏鑕或幸災樂禍或甘死徇
生求而得之又何怨也降茲以外有異於是莫不重七
尺於泰山恡一毛於尺璧徒惡其死而不知救死之有

方但惜其生而未識衛生之有術何者地居流俗之境
身當名利之路皆物之相物我之自我當仁不讓思倍
萬以孤標唯利是視願半千而秀出行高於人衆必非
之官大於國主必惡之而名譽娛其耳光榮炫其目口
甘腴泰啖鈎吻之腐腸身安棟宇誠垂堂之折足自謂
長無六疾永固百齡歸然可與金石齊堅松喬比壽者
矣殊不知關張以傲誕為將桑霍以滿盈居職鼂錯削
國以獻忠伯宗匡朝而好直處父則純剛立性張溫則

大明為識見之者為之寒心聞之者為之變色亦猶卧於積薪之上而不知火之將然巢於折荊之末而不悟風之已至既而惡稔釁盈道窮數極黃沙在繫懷上蔡而無追白刃臨頸揮廣陵而長歎猶以為禍出不虞災非素漸以茲自卜奚其謬歟假有舉一反三麤分菽麥知豐屋之不誠悟覆車之足尤而皆宴安鴆毒遲疑猶豫交戰未勝而禍機先發不杜之於欲萌方悔之於既兆用使茂先將戮顧諍子而多慙安仁已收負慈親而

永訣嗚呼自古所以多殺身亡族者職由於此也因斯而言則知禍福無門唯人自召自貽伊戚匪降於天而謂之不幸未之聞也昔夫子有云仁遠乎哉我欲仁斯仁至矣竊以仁為百行之首大聖其猶病諸然必以中才之人企勉而行猶或可及况其慎者蓋不過慎言語節飲食知止足避嫌疑若斯而已矣非有朝聞夕死去食存信之難也違之則為凶人蹈之則成吉士其為弘益多矣而世人罕能修身厲己自求多福方更越禮過

度坐致覆亡此宣尼所以譏鮑莊子之智不如葵而孫叔敖譬以螳螂伺蟬不知黃雀在後余早遊墳索晚仕流俗觀古今之人物極矣見吉凶之成敗衆矣夫貴不如賤動不如靜嘗聞其語而未信其事及身更之方覺斯言之徵矣加以守愚養拙怯進勇退每思才輕任重之誠智小謀大之憂觀止足於居常絕覬覦於不次是以度身而衣量腹而食進受代耕之祿退居負郭之田庶幾全父母之髮膚保先人之邱墓一生之願於斯足

矣但才非上智習以性成猶恐覩芳餌而貪生處鮑肆而神化苟或靜退之心日弛則馳競之慾日增顛沛以之嗟何及矣常思列銘几杖取配韋弦刻心骨而不忘傳諷誦而無數蓋語曰明鏡可以覽形徃古可以知今是用尋徃哲之事驗古人之得失寄彼形言存諸炯誠列之座右題其賦云

吾嘗終日不食三省吾身覺昨非而今是庶舍舊而謀新原夫天地之大德曰生聖人之大寶曰位生也者賢

愚定其美惡位也者朝市總其名利七情由其不等百
行以之咸異儻無心以自謀良局途其必躋何者得不
思失雄獨忘雌耽人爵以健羨窮代路之險巖是則平
衡而登九折直轡而踐三危干戈生於肘腋胡越起於
藩籬假使履獸尾而不啞探龍頷以獲奇省僥倖以適
願非仁者之所為也借如幽室鑿坯窮居負郭二頃樵
採一廛耕獲困沉名於抱關志克詘於懸箔俄拔跡於
羊豕倏搏飛於燕雀金紫照其陸離銀黃煥其沃若彼

滿盈之難守伊榮茂之易落朝結駟而乘軒暮齒劒而
膏鑊方思上蔡之犬追念華亭之鶴奚一身而足怪迺
九族其惟索爾其寂莫無事殷憂不平耻當年而功不
立疾沒世而名不成懷書訪道學古言兵擅雲間之美
譽馳日下之休聲夫鐸穴由於足響膏爍起於多明趙
國從而蘇裂齊城下而酈烹吹律誅於西漢獻寶削於
南荆遂懷沙於楚塞因說難於秦庭李仕登朝而就戮
嵇道超代而逢刑苟才智之為患雖語默而同傾若乃

猛將出師謀臣獻策鱗翼攀附風雲感激開黃閣與朱
門樹高幡及長戟恃龍蛇之恩舊望鳥兔之盡獲思擅
寵於邦家誓傳名於竹帛蜀既平而艾檻吳已霸而胥
溺黜淮陰以斃韓遷杜郵而死白彼功成而不退俄寵
謝而招隙何追憶於布衣翻興思於下澤各入門而自
媚徒弔問其何益亦有爵非才舉榮因寵遷吮癰求愛
舐痔逢憐朝承恩而袖斷夜託夢而衣穿嗤弦直之死
道喜邪徑之敗田氣噓霜而吸露力轉日而迴天自謂

方江湖而共永比嵩岱而齊堅一朝失據萬古淒然至
於申侯逼迫而辭楚盧綰披猖以去燕彼丁傅之崇貴
將梅茹之威權疇一姓其或在覆五宗而不全次有跡
鄙衡門情娛俠窟出入田竇往來平勃歌無魚以自媒
獻文蛇而請謁疑卧薪之可久謂巢葦之恒安烈火照
其潛燎衡風歛其上搏曹門傾而天鄧賈室壞而夷潘
班坐刑於黨竇殷取戮於臣桓顧噬臍而不及知觸籬
之為難夫化赤漸乎鄰丹為黔資於邇墨生於麻者既

革其操染於藍者亦變其色交非鮑叔遊異田蘇忘臭
肆之不惡持甘醴以為娛餘推誠而狎耳蕭結契而連
朱始刎頸以交約終反噬而相屠王綢繆於魏諷石嫌
疑於州吁孫秀與趙倫齊貫石顯將牢梁並驅汙無禮
以自及蹈不義而同誅別有直若史魚正如伯厚飾智
驚物露才不偶持瑾瑜而指瑕覽冰鏡而求垢彼獨潔
之為雅固羣醉之所醜况乃誹謗朝廷擯斥朋友方縉
紳以豚犢延冠蓋以雞狗符結怨於晉台彭肆言於蜀

后禍悲號於座上庾嘲謔於行後揆榮辱之在身猶樞
機之發口儻一言其靡慎奚四大之能守然則禮無微
而不警怨無小而不讐察關張之同敗審韋弦之所由
豈直君子不可罔而小人獨可仇個儻英跼昂藏遠邁
覩廝隸其如萍觀輿臺其若芥本無猜於螻蟻寧有忌
於蜂蠆安知驚炙輟授七尺由其喪亡羊羹匪均三軍
以之覆敗苟有怨其必復諒無所而不誠於是考茲出
處稽彼行藏咸知進而不知退知存而不知亡惑多言

之必敗迷暴貴之不祥彼有足而罕衛行立身而靡防
猶乘車之去軌若涉海之無航既百慮而一致故異術
而同喪唯夫明達高人賢良志士知滿損而謙益驗弱
生而強死無為福先無為禍始節其飲食謹其容止聚
而能散為而不恃潔其心而穢其跡濁其表而易其裏
範閭室而整冠循覆車而易軌以道德為介胄忠貞為
劍履愛髮膚而不傷保家室以不恥若乃詢木鴈於園
吏訪光塵於柱史萬石守慎以全榮二疏既滿而辭仕

袁不及於憎愛柳忘情於愠喜漢先主之立誠莫尚中
庸衛大夫之所羞獨為君子余雖不佞嘗從事於斯矣
重曰夫含靈稟質異品殊倫生何如而弗貴命何如而
弗珍鴈含枚以避繳狐聽冰而涉津葵傾心以衛足櫟
不材而謝斤彼草樹之無識唯禽獸之不仁猶稱能以
遠害尚假智以全真矧百行之君子迺三才之令人何
自輕於養性何自忽於周身儻狂歌之可採伊輿誦之
可詢敢刊銘以勒座遂援翰而書紳

知止賦 有序

唐 李德裕

古之稱山林之士往而不能返朝廷之士入而不能出
先哲所以趣舍異懷隱顯殊迹蓋兼之者鮮矣今余自
春秋至西漢取其卿士大夫進能知止退不失正者綴
為此賦云

觀春秋與漢策求知止之大夫魯莫高於柳惠衛莫貴
於甯俞吳乃得於延州楚乃尚於菟雖至聖無軌超
然不拘猶歎行藏以與顏稱卷懷而善遽則由聖門而

進退者得不勇於知止乎佐漢留侯與道為徒厭華屋
而不處思赤松以遊娛清則兩龔美則二疏父子欣以
相顧衰老至而歸歟祁祁青衿戴負經書藹藹玄冕祖
我城隅數冥鴻之不反皆雪涕以漣如嗟予生之疲病
念寄世之須臾曾陟險而知懼痛摧輪之不虞諒難復
於玷缺且覃思於玄虛聊揮金於餘日乃迴駕於迷途
況乎托北阜以為宅就東山而結廬仲樂得於清曠陶
豈歎於將蕪其遠眺也則伊水陸渾北繞皇居度雙闕

之蒼翠若天漢之逶迤少室東映於原隰鳴臯西對於
林間其近翫也則檻泉流於一壑嘉木盈於萬株逕被
芳蓀沚映芙蓉聽求友之鳴禽見自樂之鯨魚徙奇樹
於台嶺隱翠葉而垂珠得怪石於震澤聳青岑而韜瑜
昔有罷侯種瓜逃相灌蔬竊比君子亦能荷鉏或引蔓
於長坂或導流於清渠放情人世之外寄跡羲皇之初
望夕景於平林眺寒煙於遠墟麇麇遠而騰倚鳬鴈去
而相呼酌盈樽以自慰賴鳴琴而不孤懷綺皓而披素

卷想瀛洲而觀畫圖何必尚遍遊於名嶽蟲長往於五
湖嗟夫世於知止之道若存若無李斯忘於稅駕惠子
疲於據梧盡生涯以自若何智力之有餘庶收光之未
晚期終老於桑榆

妄心賦

唐
員峴

始吾有形與憂俱生形是幻器憂為妄情愛業潛結貪
心日萌如狂犬之逐塊似飛蛾之赴明舉世役役終身
無成慨愚者之未達嗟此志之難遏多賤實而貴名咸

棄本而逐末利之所在蹈水火而非懼勢之所存棄仁義而如脫方自以為氣足自負殊不知患其可掇夫生也有涯而智之無已鵬鷃未足適其分儒墨焉能齊其理世謂之憂我適足以為喜世之所譽我適足以為毀自我心而視物四者未知其孰是借如青樓上路紅粉佳人編貝為齒點朱為唇朗如明月之初霽芳若綠條之在春流曼臉而光射動鳴環而態新此必天下之巨豔固當衆族而咸親奚為乎鳥見之望層雲而自逸魚

見之入深泉而不出彼醜好之非我吾孰知其所失若
乃樂府窮選伶人擅名跳丸劍之揮霍奏金石之鏗鉤
復燕趙之稱最信音容之莫京清歌一轉而行雲遏長
袖屢舞而流風并實天下之樂事當觸類而含情奚為
乎爰居卒天於鐘鼓聾俗不知其韶武嗟愛憎之在物
吾孰知其所主嘗以為生者物之可欽死者人之可畏
方其髑髏之自得也不異夫南面之至貴謂死之為是
生之為非何存沒之交戰而彼我之相違嗟乎求馬於

肆馬不可以得以猿為心猿亦未之息夫制動者以靜
吾當反照於玄極

齋居賦

宋張耒

仲夏之月陰氣始至陽既盛而初剝陰浸亨而用事水
伏畏涸火燎方熾其於人也心實過炎而腎受其弊惟
人之生受命在子推卦曰坎於行為水微陽所潛元氣
之始故火甚烈則正氣或因而衰則水受害者君子之
所深畏於是居事燕息滌慮齋居既靜事以為形又遠

眇而高舒却紛華而弗陳與淡泊乎為徒絕嗜慾愛
精蓄神聲色不御滋味罕親沖然與和俱遊湛兮以道
合真故能體強志寧愉樂壽考遠去疾癘保此難老嗚
呼苟能推此以盡道考此以察物則豈惟齋戒以御時
宜其顛沛而勿失且夫冰炭相乘利害交至隕真盜和
豈獨陰沴道心惟微易失難常困於侵陵有如亢陽則
浣心滌志以却外垢虛中保和以全天君故能涉至變
而不濡更萬變而常存蓋將窮年以齋居豈特養生而

善身乎

荀揚大醇而小疵賦

宋楊傑

周漢運否荀揚教傳雖曰醇之大者亦有疵之小焉皆
命世以為文言非不粹與生知而較美道未能全嘗聞
人異禽魚性鍾天地全而稟者曰聖哲偏而得者曰賢
智聖無不通賢有未至是以周公尼父率臻大道之醇
荀況子雲未免纖瑕之累蜀國宗匠齊王老師雖抱重
器不逢盛時欲卷道以自處疾沒世而無知由是簡冊

其蘊瓊瓌爾辭立大功於是矣未盡善者有之著書三
十二篇義差而駁準易八十一首理或其畸至如論性
之淵源談道之極摯或曰善惡一而混或曰禮義皆其
偽以禮義為偽則堯舜之法歸乎詐以善惡相混則鯀
禹之心何以異兩賢於道擇不精而語不詳三子之間
得其一而失其二又如對臨武以問兵之術推子淵以
希聖之徒遠罷特愚於鼂錯談經私美於童鳥是所謂
珠不無顙瑕無掩瑜然無傷於大義實有累於名儒非

倡道之子思將何以教美不臣之新室幾近於誣向使
親承鄒魯之範模獲偶淵騫而論討然則善得以盡辨
無不早數萬言皆造純精千百世以為至寶雜乎其雜
當殊太史之書醇乎其醇可擬孟軻之道奈何智有失
慮人無全能一則晦名於天祿一則朽骨於蘭陵俱有
琢雕之雜難全粹美之稱亦猶務涉獵者賈山醇儒不
足悅紛華者子夏具體何曾噫荀也倡道於前揚也和
之於後助詩書禮樂之化謹父子君臣之守斯文未喪

大疵則否何韓愈氏重而過之蓋責賢人也厚

廣居賦

宋楊簡

四明楊子家本三江之口徙居西嶼之麓綠野橫其前
青巒維其外東海之水不憚百餘里之遙崎嶇委蛇日
致兩潮之勤於其門輸清納潤曾不少懈北山之桃李
方春盛時相與聯比參紅錯白間青厠翠組織西蜀之
錦環石魚之樓而屏之美於畫繪南園之竹榔榔差差
如立萬琅玕疎疎翦翦微風過之蕭然如奏天上之樂

於碧雲之端竹之南有水水之中有荷青圓有蒲綠纖
水仙微酣而立炯若出塵之風度而隔以雲煙遊鱗戲
涼羣羣然圍圍然至於芙蓉秋紅菊金布錢橘梢之黃
未垂而葡萄堆架擁千萬夜光之珠而爭先雖朔颶之
戒寒爛丹邱於四山而壓冰之梅獨出其奇吐孤芳而
盤旋玄冥又從而佐之翦玉鏤瑤雨花其間有家如此
亦可謂奇矣而楊子方悠然而笑曰吾又有廣居焉益
奇吾所謂廣居非棄此而他之特前所陳有目者之所

共瞻有口者之所共言吾今所叙有目者之所不覩有
口者雖欲言而無所廣居之上天所不覆胡為乎天莫
之覆也天可指天可語吾之廣居不可指不可語廣居
之下地所不載胡為乎地莫之載也地有所起有所止
吾之廣居無所起無所止廣居之東其東無窮胡為乎
無窮扶桑有名欲往莫從陽精所升猶在青冥之中青
冥有象有象有窮無象無窮吾廣居不可以象名奚窮
廣居之西其西無窮胡為乎無窮崑崙而西其遠益迷

雖極夫日入之涯道阻且修已莫之躋矧其日外之冥
冥與東則齊有涯有冥冥有窮無涯無冥冥無窮吾廣
居不可以涯言不可以冥冥言奚窮廣居之南滄溟渺
漫海外有國國外有水水之外人莫得而觀可觀者必
有所窮吾廣居尚不可得而觀奚窮廣居之北沙漠無
極骨利幹近日出之所北距大海海又無窮海雖大不
逃乎形有形之物終窮吾廣居不可以形奚窮廣居之
中天生其中地生其中日月經其中星辰羅其中雷霆

風雨霜雪變化其中人與鳥獸蟲魚萬彙盡產其中然則所謂揚子者居於其中之何所哉三江之口乎西嶼之麓乎室乎堂乎序乎塾乎石魚之樓乎南園之竹塢乎謂不居乎三江之口不可謂果居乎三江之口亦不可謂不徙乎西嶼之麓不可謂果徙乎西嶼之麓亦不可堂無中邊室無戶牖序豈東西塾非左右樓雖可登而難升塢雖可遊而莫有大哉乎廣居以文宣至聖猶莫知其鄉以洙泗諸侯猶不得其門學者愈行而愈遠

智者愈言而昏者愈不聞壁闥四闢而宗廟之美百官之富非立牆之外者所捫是有不求自有之至樂宮商日奏金石日諧油油而溶溶易直子諒莊敬中正高明而有融泰和而粹冲世樂有窮斯樂靡終舉視聽心知之屬不以為有旦暮有古今有始終而寂然莫之移洞焉乎空空緝熙靈府之光明混涵聖域之冥濛而圓首橫目之子方且日持鑽堅之錐力運鑿深之鉏進寸而退尺欲前而倒趨嘻嘻吁吁

索居賦

元吳萊

粵吾生之寡好兮恒孤陋以索居步中庭以自念兮心
抑鬱而不舒阨予身之兀處兮撫萬化之殊塗豈寰區
之迫陋兮杳不知其所趨惟世氛之混濁兮尚蓬藿之
藏匿欲奮迅而激昂兮又遭迴以沉默去衆人之佻巧
兮膺泰定以堅飭紛荆棘之枻行兮謂邛峽其繩直肩
重任之迢遙兮固邪許之不力儻泛駕之有求兮策罷
駕且焉止息巡簷隙而詠歌兮撼戶櫟以悲惻何初日

之成言兮乃棄予而不我即彼昔游之為豪舉兮曾同
處乎險巇羌結交以鼓勇兮肯羈囿之遑安抗沙塵而
志得兮巍弁冕之星攢既文鷗之炳耀兮嗤薜蘿以為
寒仰睇遠而弗及兮莽浮雲之瀾漫俯聽幽而若來兮
哀風激夫溪湍汨寥料其無景兮甘倔强以此蟠徒離
羣以蕭颯兮庶神氣之我完折松枝而拂石兮又植之
以青蘭宜道義之孺孺兮肯肥癯之異觀董生之談王
兮且有稱於不遇賈誼之明治兮謫長沙而徑去將屠

販之汙下兮恐紛紛而改度逮曲學之肆行兮使吾儒
之愆素古固有此混淆兮矧予今之馳騫寧窮達之措
懷兮曰美人之遲暮循自然之天運兮芳草靄其發榮
倚巔岼之絕壁兮臨萬仞之潭泓款淺渚以澹泞兮樂
儵魚之不驚構危巢其惴慄兮恍若聞乎鼉鼉非山林
之忘反兮奈世務之所嬰手不得以豎指兮目又何能
以逃睛因樗散之乏用兮託考槃之遺聲永言抱此幽
獨兮庸詎釋夫我忤

定命賦

元吳萊

昔岐周之懿哲兮垂末躅於勾吳延州來之閎博兮秉
世德以作模予既稟此美質兮參兩間而與俱日礪礪
以頡頏兮違陋巷而適通都膺文華之被體兮結雋逸
以先驅翩黃鵠之千里兮炯驪龍之吐珠倚山丘其峻
峭兮汨河海之盤盪奇材未得以自致兮恐薄俗之淪
胥叱玄夫為予枚卜兮徵吉繇以弗渝曰心遠而跡滯
兮何時命之獨拘怡怡其曠懷兮惕惕以深省收羣囂

於一默兮守不動於真靜規豪舉於鴻冥兮混牧芻乎
鹿町胡魁梧之數奇兮彼樸鈍則猶天幸遵大路豈不
可兮莽荆棘使吾騁亦欲逃於空虛兮走赤日將焉避
影聿軒騫以有行兮仍輶軻甘所屏離當世之紛紜兮
合自然於溟滓羌造化之無象兮妙機關之翕張叢生
植之各異兮肖智愚以何常役中心之閑雜兮煽六鑿
之披猖朝奔騰靡所止兮夕偃息恍若有亡灑屏翳之
淋漓兮吹招搖之耿光智而出於神奇兮儵又臭腐不

得當邈自古之若茲兮哀吾生之不淑畸汝形而益臞
兮怪汝志之彌蹙言蹇澀以少味兮步踈蹢無所投足
奮骹齟而衆嘖兮割肯綮以旁觸惟先儒之談王兮固
卓立以忤俗環車轍而至老兮陳詭詩以遭逐問蘭陵
悲芳草兮登鄒嶧感喬木憮素衷之陘尻兮繇千祀其
芬馥彼薈閣之弗思兮行狹邪如平陸託黃老而險韞
兮攻春秋以阿曲亂鳬鶴之短長兮衝涇渭之清濁不
率循於中正兮每僥倖以致夫顛覆豈昔吾之自奮兮

今獨有此沉憂託松柏之幽蔭兮招麋鹿而與儔俯環
堵之湫隘兮猶采椽之雕鏤駕柴車之樸素兮亦炫燿
其華輶等羹藜乎梁肉兮齊衣敝於貂裘窮匪通其不
鄙兮賤無貴以何羞嗤予音之寡和兮譽汝器之無不
周斯視聽之既狹兮曾不遇曠與婁麒麟出而野死兮
鳴鸞鳳之啾啾幸定分之有在兮肯他岐之往謀何豔
陽之駘蕩兮破寒谷之颼颼諒勾萌之畢達兮雖壅閼
其無由不吾用則亦已兮况斗絕於荒陬終越秣以燕

刷兮夫何足以自疑

自修賦

明薛瑄

皇降予以衆美兮寔清明而粹全胡賦質之不猶兮乃
蔽昧而強孱自有識而發憤兮窺前修之間關誦古訓
之數數兮服至理之拳拳雖苦心而極力兮猶未從容
乎矩步忽內怛而自修兮吾知其故善既復而或失兮
怠與敬其交騫心暫開而或蔽兮理與欲其紛互此實
進退之機兮肇千里於跬步苟決擇之不勇兮將邪羸

而正負蓋必欲敬於理而保持兮於怠於欲其屏去既
經心以自明兮復誦言以自固庶成性之存存兮全上
天之所賦


思本賦

明薛瑄

吾行年之匪少兮胡貿貿而靡思善惡原於秒忽兮寢
千里其遠而木油油而上聳兮波汙汙而載馳托后土
之鴻龐兮本大化之無涯肇總總之衆物兮咸資始於
天淵矧含靈之物秀兮孰有不自其先先昭列而在上

兮子孫繩其在下或一日而不思兮將原竭而本仆或
廣植而不食其穫兮或勤施而不責所負渺河流之汪
淫兮潤實漸於遐土啓我人以坦途兮關我人以大戶
既登名於薦書兮復顯仕於朝列念積累之艱難兮恒
拳拳而恐失服聖賢之明訓兮索衆妙於微蹟仰皇昊
之賦畀兮保天理於晷刻謹予識之昭昭兮匪他岐之
敢惑潔予身之皓皓兮豈外物之能淫是惟顧本源以
自修兮若見親於羹牆行斯百而靡虧兮體毫髮而匪

傷堅此志之罔替兮愛此言之不忘敦忠孝而日新兮
庶末盛而流長



御定歷代賦彙卷六十九